



Vol. 59 No. 9

March, 2021

# HINNA THAH



KUMPUAN

“LALPA DIINGA PHATUAMNGAI”

Tita 2:14

# HINNA THAH

Vol. 59 No. 09 | March, 2021 |

## Editorial Board

### Editor

Rev. Thangkhanlal Hangluah  
(7005433057)

### Joint Editors:

1. S. Pauchinlian  
(9597515230)

2. Hh. Khaizathang  
(7005689071)

### Subscription Manager

L. Ginsuanmung

### Contribution Editors:

Rev. B. Nengzachin

Rev. T. Chinkhangen

Rev. H. Kamkhanlal

Rev. T. Danial

Rev. P. Khamthianmang

Rev. Paukhochinjam Thangsing

NTBCA Office contact no.  
7630096496

## contents

- Editorial..... 01
- Lalpa'n ahung vehlai nite geldoh in..... 04
- Gingu hinkhua a kinepna hing ..... 07
- Social media zang a Pathian biaha..... 09
- Paahna bukim ..... 13
- Tonggim leh puahgih pawte..... 16
- Bible Study..... 18
- Charles H. Spurgeon..... 23
- NTBC Khuangnung camp report..... 29
- HBCH..... 30
- NSS Teachers' orientation 2021 ..... 31
- Bible College kithuahphna dinga chialna..... 32

### Hinna Thah laah man kum khatin

By Hand = Rs. 150

By Post = Rs. 200

Email Id: [ntbca@yahoo.com](mailto:ntbca@yahoo.com)

Thusuah photmah Editor ngaihdaan  
ahi veh sih, a suahtute'n moh  
akipuaah diing uhi.

# HUNG HUNDAM IN, HUNG HUNKHIA IN

~ S. Pauchinlian

**K**um bul kipan pan chi a i na um laiin kum 2021 March ha tan bang a khut haat a hungpui i biah Pathian kawmah kipaahthu i gen masa hi. Khristian zousiah te in kum teng in Jesu Khrist hinkhua a thiltung; Khrist pianni Khristmas, Jesu gualzoutah a Jerusalem ah aluut ni Palm Sunday, Kros a killhbeh a aum ni Good Friday leh Jesu haan apat a thohkiitni Easter Sunday bang i zang veu uhi. Awle, tua i genteng lahah tukum March 28 Palm Sunday ahihtoh kiton in Palm Sunday toh kisai saulou houlim uthuai kasa hi.

A taangpi in khovel a Khristian zousiah in Palm Sunday, Jesu Jerusalem ah gualzou a loupitah a aluutni a kizang hi. Palm Sunday program i bawl vaang un Khristmas bang in i ngaipoimoh zoulou uh a bang hi. Ajiahchu Khristmas manglough diing chu nasatah in i pawna va, himahleh Palm Sunday, Good Friday leh Easter Sunday te chu i ngaipoimoh zousih un ka mu hi. Palm Sunday a Jesu Khrist gualzoutah a Jerusalem a luut in Jesu chu Judate in a ngaahuh Khrist (Messiah) ahihna a sulang ahi. Huleh Jesu hinkhua ah hini chu mite tawimawi hun umsun Bible a kimu zong ahi diing hi. Jesu Bethlehem bawng inn ah a hung piang in belaampute leh suahlam mipilte in silpiaahte tawi in kipaahthu in va delh mahleh uh hini chu mi tamtah diing in dahna leh kahna ahi diing hi, ajiahchu lal Herod in naupang kum nih nuailam zousiah a thahbei jiahin. I gen utpen Khristmas a hisih a, himahleh Palm Sunday i thupi ah i panta diing hi.

Jesu Khrist Jerusalem ah a luutni chu tanchinhoihte; Mathai 21:9, 15; Marka 11:9-10 leh Johan 12:13 ah amuhtheih hi. Hini in nungzuite leh mipi paikhawmte in *hosanna* chiin a aw te uh theihtawp a suah in a kikou uhi. Hosanna khatna chu 'hung hundam in' ahihlouhleh 'hung hunkhia in' chihna ahi. Huleh hosanna chu hebrai haam apat a kilakhia ahi a, huleh Psalm

118:25-26 apat kila (cite/quote) zong ahi. Bangziah a mipite'n hung hundam in ahihloughleh hung hungkhia in chi a kikou ahi viai? Jesu Khrist in a mi Israelte hundam diinga hung ahihdan zong ana gen kha ngeei hi. Mipite in Jesu Khrist hungna chu a mite hagaulam saltaangna apat hundam diinga hung ahi a. Himahleh mipite in Romte thuneihna nuaia pat suahtat bang ana kinem uhi. Tahsa leh Political zaleenna kinem in mipite in puan leh tuum nah lampi a phah in hosanna chiin aw a suah uhi. Bangziaha mipi te in puan leh tuum nah tual a phah adiviai? Zawlnei Malachi leh nungzui Mathai lehkhahu kikaal a lehkhahu kigial (Apocrypha - books written during the silent period) 1 Maccabees 13:51 leh 2 Maccabees 10:7 a kimudan in tuum nah te chu gualzoutah a kumpi leh sepaihte a hungpai Chiang un Judate in aphah zel uh a chi uhi. Ahihleh Jesu Jerusalem ah aluutni in mipite in puan leh tuum nahte phah in, Jesu chu Sabiltung tungah tuang in a hung pai ahi. Zawlnei Zechariah in Jesu piangma kum 450 ahihloughleh kum 500 vel paita a zawlnei in a genlawh mahbang in Sabiltung ah kingainganmah in a hung tuang ahi. Bible siamte in hichiin a gen uhi, Jesu sabiltung a toua a hung pai chu kumpi ahihna etsahna ahi a, himahleh a kumpi hihna chu galdou kumpi ahihloughleh gallaah kumpi bang in a hisih a chi uhi. Bangziah in ahiai i chihleh Jesu galdou kumpi ahihloughleh gallaah kumpi a hungpai hileh sabiltung a tuanglou in sakol tung a tuang in a hung pai diing a chi uhi (Thuphuan. 19:11ff sim in). Hichu a dihmah zong ahi, ajiahchu Jesu in tanchinhoih Johan 18:36 ah hichiin a chi hi, "Ka lalgam chu hi khovel ahisih" chiin a gen hi. Hujiahin Jesu hung pai masatna chu hagau lam toh kisai ana hi a, huleh a hung kiitna diing chu khovel lalgam lam a hung hi diing hi (Kumsang lalgam). Hih Palm Sunday hun a mipi paikhawm te in Jesu sabiltung tunga tuang a lungsim va a heetpah diing uh khat ahihleh Jesu chu kumpi ahi chiin a koih diing un ka gingta hi. Ajiah ahihleh Israel kumpi Solomon ngeizong kumpi ahihna suhdet na diing in sabiltung tungah tuangsah in a um hi (1 Kings 1:38-40 sim in), huleh kumpi Solomon lal sung in Israel in gaal a neisih hi. Hih Palm Sunday a kipahtah leh kinemtah a hung hundam in, hung hunkhia in chi a kikou te in ni tamlou zoh in killhbeh un, khailum un chiin a kikou kiit uhi.

Awle Palm Sunday a Jesu Jerusalem khopi ah gualzou a loupitah a aluut in mipite in 'hung hundam in, hung hunkhia in' chi a hutdamna/hutkhiatna apoimoh jiah va a kikou mahbang un, hun chinteng in soal silbawltheihna apat Jesu hundamna/hutkhiatna i mamoh zing ahi. Hichu Khrist hundamtu a nei nailoute kikou thawm zong ahithe i, huleh hutdamsa te kikou thawm zong ahithe hi. Niteng leh hun teng a gingtu gualzou zel hinkhua i neihtheihna diing leh, melma soal douzoh na diing in i hundampa Jesu Khrist kawmah 'hung hundam in, hung hunkhia in' chi a kikou chu i zum louh diing ahi.



**Huleh Jerusalem kawm, Olive Taang kawma Bethphage leh Bethani atun tahun, Jesu'n a nungjuite laha mi nih a sawl a; huleh a kawmvah, "Na mazawn va khua ah vachiah unla, huleh a sunga na luut tahchiangun sabiltung talgual kikhit, a tunga koimah tuan ngeilouhna khat na mu pah diing uhi. Huchu hung suut unla hung kai un. Huleh mi koiaha in na kawmva, 'Bang diinga na suut uh ahiai?' a hung chih leh, 'Lalpa'n a mamoh ahi, hitah mun ah a hung thahkiit pah diing,' chi un," a chi hi. Huchiin amahuh chu a chiah va, inn pua kot bul a lampi kawma sabiltung talgual kikhit chu a mu va, huleh asuut uhi. Huleh hutah a ding koite aha in a kawmvah, "Bang diinga sabiltung talgual suut na hi viai?" a chi uhi. Huchiin amah un a kawmvah Jesu'n thu a piaah bangin asoi uhi. Huchiin a chiahsahta uhi. Huin amah un sabiltung talgual chu Jesu kawmah a hung pui va, a tungah a puan silhte uh a phah va, huleh Amah chu a tungah atuangta hi. Huin mi tampi'n lampi ah a puante uh a phah va, a dangte'n sing a sawlbawh saatin lampi ah a phah uhi. Huleh malam a paite leh nunglam a juite'n, "Hosanna ! 'LALPA min a hung paipa chu a hampaha hi!' Lalpa min a hung tung diing i pu David lalgam chu a hampaha hi! Tungnungpeen ah Hosanna!" chiin a kikou uhi. Huin Jesu chu Jerusalem a Pathian biahinn ah a luut hi. Huchiin sil zousiah a en kiimveel a, nitaahlam ahihtaah jiahin, sawmlenihte toh Bethani ah a chiahta hi.**

**Mark 11:1-11**

# LALPA'N AHUNG VEHLAI NITE GELDORH IN

~ Pastor David Simte NTBC, Bangaluru

**L**alpa Jesu Khrist chu khovel ah a lenlai in khatvei sunsun paahtawi in a um hi. Huleh Lalpa Jesu paahtawia a um ni in gualjoutaha kumpi bangin Jerusalem ah aluut a, mite'n kipaahatnin ana lamtuah uhi. Hu ni heetzingna diing in kumteng in Palm Sunday chiin gingtute'n i zang zing uhi. Huleh Palm Sunday chu Jesu Khrist kumpi ahi tahzetna chih etsahna ahi a, Amah chu kingaingiamtah in sabiltung nou tungah tuang in Jerusalem ah aluut a, mipite'n alampi ah puante leh sawlbawhte phahin, Hosanna chiin Jesu nung ajui uhi. Jesu Khrist sabiltung tungah a tuangin kumpi ahihna a sulang a, hu etsahna apoimoh mah bang in a hung thupuaah zong apoimoh mahmah hi. Palm Sunday ni a Jesu Khrist hung thupuaah chu Luke 19:41-44 sung apat in i en diing uhi. I changteel apat in Lalpa Jesu Khrist hung thupuaah, Lalpa'n ahung vehlai nite geeldoh zing apoimoh daan leh bangjia poimoh ahiai chih i enkhawm diing uhi.

***1. Lalpa chu na mit apat a kiphualta diing hi (19:41, 42).***

Lalpa Jesu chu Jerusalem a tung kuan-un khopi chu a en a, a kakhum hi. Ajiahchu tuhun in mipite'n lemna hung tut silte a hepha nawnta sih va, hujiahin tuin Lalpa chu amit vapat phul ahita hi. Tulai i khovel uh pandemic jahin biahna ngeina bangin i kikhawm theih nawnta sih uhi. Huin Pathian eite apat awlawl a kiphual chu ahita mei hi. Gingtute kikhopna aum theihlough chu mi hunkhop adiingin hagau

lamah zakiatna liantah ahung suah diing a, huleh biahna lamah lungluut louhna ahung siamsah diing hi. Bangjiahin ahiai ichihleh mi tamtahn mahni Bible simna hun amo ahihloughleh thuumna hun a kizang tawm mahmah a, huleh hu diingin zong hun a kipezou sih hi. Hubanah gingtute hunkhop in i kikhopna uh chu hagaulam ah kingahna bangin i nei va, Pathian thu ngaihna, Bible simna leh haamteina chu kikhopna i bawlteng setbawl in, hulouh chiangin lah

Pathian lamah i buai phasih uhi. Ajjiahchu lemna hungtut Jesu chu i hepha nawnsih va, i ngaihsah nawnta sih uhi. Hujiahin mimaltaha mahni chiat kidong diing hitalei, i hinkhua zah daan ah Pathian ei apat kiphual bangin hun na zang ei? Ahihloulhle Pathian toh na kizopmatna na keemhoih zing ei? Hi dotnate mahni ah dawngin, Lalpa chu i mitte vapat phual ahih main Lalpa'n ahung vehlai nite i geldoh zing diing uhi. Huchilouin chu hunkhat ah Lalpa chu ei apat phual ahi ngeei ngeei diing a, huni ahung tung main Lalpa mah buaipih in nei chiat diing uhi.

## ***2. Meelmate'n taaikhiatna umlouin ahung uumkhum diing hi (19:43).***

Lalpa Jesu'n akawmvah, "Na meelmate'n hung uumbichilh in kulh abawl diing va, taaikhiatna diing zong umlou a ahung uumkhumna diing nite ahung tung diing hi", achi hi. Gingtute'n i meelmate hesiam hilei i pumpelth thei diing a, huleh i taaimangsan diing uhi. Himahleh i meelmate bang ahiai chih i heetsiam louh jiahun hung uumbichilh in kulh ahung bawl khumta uhi. Mawltaha i meelmate bang ahiai

chih dawnna chu hichiin i pe diing uhi- Sil bangkim Pathian apat hung khenkhiathei zousiah chu i meelmate ahi. Huchi ahihleh tuhun in bang pentahin Pathian na biahtheihna diing ahung daal ei? Ahihloulhle bangin nang toh Pathian kimeelma in nangah kulh abawl ei? Tulai a koi a koi hitazongleh thil poimohloute'n i hun tamjaw ahung laahsahta uhi. Bible simna diing hun leh haamteina hun zat saangin internet bang, movie bang leh sil tuamtuam a diing in hun i piah va, Pathian toh a maw, innkote toh a maw ahihloulhle loilehpaaite toh hun zatkhawm saang in mahni a diing sil poimohloute bawlin i buaipih jawta uhi. Pathian a diingin hun akinei nawnsih a, hite chu Pathian toh hungkhen i meelma ahi uhi. Hujiahin i hindaan i henglough uhleh i meelmate'n hung uumbichilh a kulh hung bawlkhum chu ahita mei hi. Hujiahin Lalpa'n ahung vehlai nite geeldohin Pathian toh i kizopmatna hung khenthei zousiah i taaisan diing uhi. Huchilou inchu i meelmapa'n hung uumbichilh in kulh a hung bawlkhum diing a, taaikhia uutlei zong taaikhiatna diing umlouin a hung uumbichilh diing hi.

### 3. *Meelmate'n ahung suhchimit diing hi (19:44)*.

Lalpa Jesu'n akawmvah, "Nang leh na sunga na tate tual saatna in ahung nei diing va, na sungah suang khatbeeh kithuapin ahung nese sih diing uhi, ajiahchu ahung kivehlai nite na heetlouw jiahin", achi hi. Meelmapa in koimah ahung hawisih diing a, hung suhnat mei chauh uutlouin i pumpi in ahung susia dimdem uut hi. Khangthahte, nulehpate leh naupangte chih umlouin i hihna bangbang in ahung suhsiat sawm hi. Huleh unaute tampi zong ahung suse zouta a, muhtheihin khangthah thahaatlaite bang suhsiat diingin apuhsah a, nupi leh papite zong apuhsah a, huleh naupangte nangawn zong hawilouin i hinna uh ahung suhtawmsah nalai hi. Meelmapa in gitlouna chintengin ahung dou diinga nang leh kei chu zatna bei a hung umsa auut hi. Innkote adiinga phattuamna umlou, kouhtuam ah lah panlaah sawmlou leh mahni hinkhua ningkitelna in ahung suchimit diing hi. Kingaihsiatna bang, thasiatna bang, khamtheihte bang leh lungkimtheihlouna bangin ahung uumkhum

diinga, mahni hinkhua nasan suhtawp diing khosalou khopin ahung suse diing hi. Hitobang meelma in nichin in ahung suaala, hung suhchimit sawm in theihtawp suahin apang hi. Nang leh kei gaal muangin i um naisih a, hujiahin nichin a i meelmate chu douzing uh akuul hi. Hujiahin Lalpa'n ahung vehlai nite geeldoh a, i hinkhua maw mei a zangloua Pathian thu leh laa, Pathian nna mah i buaipih jaw diing uhi. Huchilou inchu siatna in ahung tungkhum diinga taaikhiatna umlouin ahung suchimit kha diing hi.

Unaute, tukum Palm Sunday zang diinga i kisingsahna ah Lalpa'n ahung vehlai nite i geeldoh thah uh apoimoh mahmah hi. Hosanna chiin Lalpa chu i saltaangna apat hung hundam diingin i kou thah diing uhi. Ajiahchu Lalpa chu i mit apat akiphual ni ahungtung diing a, meelmapa in hung uumbichilh in kulh ahung bawlkhum diing a, huleh taaikhiatna diing umlouin ahung suse dimdem kha diing hi. Hujiahin Pathian chu i biahtheih lailai in Pathian biahna lamah theitawp i suah diing a, Amah thu leh laa zilna ah i hun hoihte i pe



diing va, huleh haamteina zang diingin I saltaangna  
ah thasialouin kuhkaltahin i apat hung suahtasahta hen.  
pang diing uhi. Lalpa'n simtu Pathian deihlam bawl zousiah  
zousiah chu hinkhua thah ahampha hi, Hosanna.



# GINGTU HINKHUA A KINEPNA HING

~ Pastor S. Khupchinhau NTBC, Suangpeehmum

Joshua 3:1-5

**S**ingtaang a teengte'n kumbul Chiang in Lou a kivaat pan a, huchi'n kumtawp tan a buh neih diing bang, meh diing neih bang kinepna toh Lou a kibawl hi. Singtaang leh phaijaang ah zong nu leh pate'n kum bul a hihtah Chiang in ta leh naute school kaina diing ngaipoimoh in i buai veh va, huchu kum khat sung a diing chauh a kinepna nei zong i hisih a, himahleh a hung khanlet dungzui va siamna leh pilna a hung khanglian a, nikhatni tah Chiang a sepna a hung neih diing uh bang i lamen a huziah a gim leh tawl poisalou a school i kaisah zel ahi. Huchouh hilouin local kouhtuam khat in sum tampipi seng in camp (hutdamna camp) i nei zelva a hoih mahmah ahi, hite ah zong

a gah muh diing kinem in camp i bawl ahi i chilou theisih a, i kouhtuam member hutdamna tangloute'n hutdamna a hung neihva, a hung kisiamthah uh i deih leh i kinepna ahi ngeei diing hi. Huchouh hilouin i pawlpi NTBCA in zong India gamsung leh mun tuamtuam te ah Missionary i sawlkhe zelva hichu a gah i kilamen zing uh ahi. Ei mihingte nangawn in zong i bawl phot chu lametna nei in i bawl ahi. Huchi ahiehleh eite hung siamtu pa Pathian in ei ah lamet neilou diing a diai? eite tellou in zong Pathian nasepna khawl sinteh na chi meitheh, a dihmah kaniel Lou himahleh mikhat chiat ah zong Pathian in tup a nei chih i mangngilh tuanlouh deihhuai sa ka hi.

Aw nang gingu, na Pathian kawm tung diing a lampi napai zinglai in na kinepna, na lametna kumtuang Pathian thuhun toh a kituah nai? I chaangteel ka etleh Israel tate Kanaan gam khuaiju leh bawngnawiluanna a luutma un a maban vah Jordan lui a kaan diing uh ana um hi. Himun apat i zil diing a deihhuai masa ahihleh, Pathian a kinepna nei a mah kawm tung diing sih leh nat umlouhna, chi in a nop diingdan laa in i sa i sa a, humun tung na diing a i lampai laiin i ma ah sil hahsa i tuah hun chiang in ei gingu te'n bangchibang in i dawng ei? bangchi bang in hinkhua a sil hahsa pal gaalkai i sawm ei?.

Joshua 3:1-4 sung tuunkhawm lei, himun ah Israel tate'n Jordan gaal a kaina diing un Pathian thupiaah a juhi diing uh a um ahi, simtute Pathian thuman hih ei a diing a koitheilou i hihkhah diing sil lauhuai kasa ahi, thumanglou leh gilou mi i muh chiang a mohsa a eimah hinkhua a i juhi johteng dihkim sakha gingu hihsawm dah ni. Jordan luui chu amauh thahatna in a kaan jousih va, himahleh Pathian silbawlttheihna toh a kaan jou uh ahi. Bangjiah in Pathian

thupiaah a mang jiah uh ahi i chi ngam ahi. Pathian in bawm zawngtute paima a pailouh diing bang, thu ana pia ahi, hute botsia in gamtang uleh a si diing uh ahi. John 14:15 ah Jesu'n "na hung lungsiat uleh ka thupiaah te juui un" ana chi ahi, thupiaah juhihna hi gingu kinepna toh hinkhua jangte i hihjiahin ipoimoh mahmah sil ahi i chinuam ahi.

Joshua 3:5 na i et chiang in "Pathian na lahva hung kilaah diing ahi, kisusiangthou un" chih thupiaah i mukit ahi. Unaute aw siangthou Pathian kawm tung diing ihi i kinepna uh, ahihleh i siangthou apoimoh ahi, sim diing hanga ja diing hanga, soi diing hanga himahleh i hinkhua angeibok, kihengna umlou chih chu umzia a umlou ahi. Siangthouna poimoh ihi unaute.

NTBCA sunga Pathian a hung kilat theihna diing in siangthouna apoimoh a, Simte sung a Pathian a hung teltheihna diing in siangthouna apoimoh a, i insung ah ahungtel a munlai a tang theihna diing in siangthouna apoimoh a, i mimal hinkhu ah

Pathian deihdan a hihtheihna diing in hi siangthouna mah apoimoh ahi. “Siangthouna louin koima’n Pathian a musih diing” Heb. 12:14 ah imu ahi. Vaangam nuam kinem a leitung a khualzin

leh vaithaam ihi a, i kinepna atawpna chu nikhat ni Chiang a Lalpa kawm tung diing chih ahi. I tun theih ngeei na diing in, Lalpa thupiaah mangni, huleh hinkhua siangthou mah toh amah nungjui ni.



# SOCIAL MEDIA ZANG A PATHIAN BIAHNA

~ H. Lamkhanlal B.Th 3<sup>rd</sup> Year, Biblical Theological College & Seminary

## Thumapui

**M**alaita saang in tu hun ah Pathian thu baihlamtah a muh leh sim theih in a umta hi. Hilehzong mi tamzaw in Bible i simtawm zawta va, himahleh niteng in Pathian thu chu Facebook, WhatsApp leh a dang dang apat a sim theihzing hi. Huin tulai Khristiante biah daan ngeina ah chouna ahung siam a, huziahin gingtute’n lam tuamtuan a Pathian i na biah theihna uh i suhlet sem uh apoimoh hi. Huleh khovel siamna vanzat a khangtuh sem dungzui in Pathian i biah theihna vanzat zong khangsah in, khangthahte’n Pathian thu

toh a kigamlaat louhna diing un gingtute’n zong hu vanzat i zat uh apoimoh mahmah hi. Huleh Pathian natongtute’n zong hutobang vanzatte khangthahte toh i kihoumat theihna diing a, i heetsiam uh chu i mohpuahna uh khat ahi a, biahdaan ngeina sumanglou a, Pathian biah daan peen hu vanzatte tungtawna i suhaat zaw diing uh ahi.

## Pathian biahna a paidan

Daanpiahkiitbu 12:1-5 ah Pathian in Israelte kawm ah ginglou mite pathian biahna mun amoh! ahihlouhleh a biahna bawl bangva bawllou

diing in a hilh hi. Pathian in a biahbuuh bawl diing daan uh a let daan, a jepmawi diing daan leh a sunga sil umdiing zousiah zong kichiantah in a hilh hi. Huleh Pathian biahna ah bawl diing leh bawllouh diing daan zong a hilh detdet hi. Hizongleh Khristiante'n Israelte bang a Pathian chihdaan zuikim a Amah biah chu a hitheilou a hung hita hi. Ajiahchu ganta a kithoihnate in sualnate a laahmang theih gual a hisih hi (Heb. 10:4). Huziahin Pathian in a Tapa kithoihna bukim diing in a hung pia a, huleh Jesu a sih in, temple a mun siangthoupen a puanzaah a tunglam apat a nuailam tan in keeh-nih a hung ki suah hi (Matt. 27:51). Huin Gingtute chu tawndaan biahna apat a hung zaleensah a, Pathian toh tangtah a kihou theihna chu phalsah i hita uhi. Huleh Hagau Siangthou piaah i hihtaah jiahin, "Pa chu abe tahtahte'n hagau leh thutah a abiah diing uh ahi" (John 4:23).

Kouhtuam masate hunlaiin, gingtute'n Lalpa nitaah an bang nekhawm in (Silb. 20:7), haamtei khawm in (1 Kor. 14:15-16), late sa khawm in (Eph. 5:19), Pathian thu simkhawm in (Kol. 4:16)

leh thohlawmte a piakhawm uhi. Huleh Pathian in loupina sangpeen a tangtheihna diing in a zat theihtheih na ah a zang uhi. Huziahin tulai social media te tungtawn a i biaahna ah Pathian in loupina a tangleh dihlohna amoh haamsiat bangmah a um sih hi.

### Pathian biahna in a tuppen

Social mediate tungtawn a Pathian i biah theihna diing in Pathian biahna in a tuppen bang a hiai chih gingtute'n i heetsiam uh a poimoh hi. Huziah in, Hebraite 10:19-25 apat Pathian biahna in a tuppen i enkhawm diing uhi.

*"Huziahin unaute, Jesu sisan ziaha mun siangthoupeen a luut ngamna neiin, Eiuu diing a ahungbawlsah lamthah leh hing ah puanjaah (huchu a sapum chihna ahi) kaantan in; Huleh Pathian innkuanpihte tung a siampu lal khat i neih jiahin; Sialephaheetna hoihlou apat i lungtang uh thehsiang a umin, i sapum u'jong tui chiim a sil a um in, huleh ginna heetchianna lungtang dihtah toh i naih diing uhi. I ginna thuphuan pen uh lawnglou keiin i tudet diing uhi; Ajiahchu amah thuchiam hung petu chu a ginum hi. Huleh lungsiatna leh silhoih bawlna*

*lam a kitothou diing in khat le khat i kingaihtuah diing uh. Khenkhatte bang a i kikhopnate uh tawpsan lou in; himahleh khatlehkhat kahasot tuah jaw in; huleh ni a hung naai hulhul chih na heet un kahasot tuah seem un”.*

Kouhtuam sunga kikhopna ah, gingtute’n a zuih ngeingei diingte:

1. Lungtang kichiantah a Pathian naih a, Amah ah ginna kichiantah neih diing.
2. Kinepna thuphuan tudet zing diing.
3. Lungsiatna leh silhoih bawl ah khat leh khat kitothou tuah diing.
4. Khat leh khat ki hasot tuah diing.

Hitobangte chu media tungtawn a Pathian i biahna ah i ngaihtuah chiat diing uhi. Hujiahin kouhtuamte ginna lam ah media tungtawn a Pathian i naihsem va, mimal chin i kinepna uh suh-hing a um a, khat leh khat na kitohsah diing a hasot aum va, huleh i bawl zousiah ah Pathian in loupina a tangleh, gingtute’n i bawl diing mawng uh ahi.

## **Pathian biahna ah media phattuumna**

Jesu’n thu a soi chiangin tehkhinthu bang zang in a hihhchian zel hi (Mark 4:34). Hubang mah in Jesu bawldaan enton in, i thusoi uttetaangthu etsahna bang muhtheih in sulanglei kikhopna ah bang phatuam mahmah diing hi. Huleh Jesu’n lalgam thu bang leh Pathian hihna a gen uut chiang in mite theihshiam theihna diing in tehkhinthu bang a asoi mah bang in, kikhopna a ngaikhetute’n a theihshiamna diing a taangthu bang, video bang leh sermon point bang suhlat theih chu a phatuam mahmah diing hi. Khristiante biahna chu Pathian lam etzingna ahi a, huleh sil bangkim a hunhun a i bawl zousiah chu Pathian lam etzing theihna diing a hung panpihtu a hih apoimoh a, hujiahin ngaikhetute heetsiamna diing leh phatuampih diing a bawl ahizawh diing hi. Huleh kikhopna ah media te zahna tungtawna i tuppentah diing uh chu Pathian biahna dihtah khangsahna diing ahi a, mite ngaihdaan subuai diing leh mahnikitawisanga diing a hisih hi. Hubanah media chu mite nopsahna diing ahihlouhleh

a thanopna diing chauh ahieh huchu a phatuam sih hi. Sawlleh Paul in, *“Sil zousiah kei diing in a sianga, hizongleh sil zousiah a hoih kim sih hi; sil zousiah kei diing in a sianga, hizongleh sil zousiah in a siam hoih sih hi. Mi koimah in amah ngen hoihna diing hawl lou in, midangte hoihna diing hawl jaw heh”* (1 Kor. 10:23, 24), a chih mahbang in. Hilehzong Pathian in loupina a tang a, mite hagau lamah a khangletsah a, huleh mite nahoih tong diing a, a hasot leh huchu a phatuam hi.

### **Thukhaahna**

Social media leh vanzat chituamtuamte chu soal a hisih a, huleh Projector zang a Pathian thu leh laa i kapdohte ah dihlohna bangmah a um sih hi. Hizongleh kikhopna ah mi khenkhat in labu zah ana uut zong a umkha meitheh hi. Huleh i deihtelna ah bangmah

dihlohna a um tuan sih hi. Himahleh deihtelna a hung kibatlouhta inzong khat leh khat i kiheetsiam tuah chiat diing uh a poimoh hi. Ajiahchu gingu zousiah chu, *“Lemna gui a kaankhawm a Hagau a kipumkhatna chu vom tinten diing ihi”* (Eph. 4:3).

Social media zah diing daan genkim vehtheih ahisih a, hizongleh a tunga i gente chu a taangpi i bawlteh diing a ngaihdaan ahizaw hi. Huleh Pathian biahna kikhop khawm in a tuppi pen chu Pathian hesem diing, Amah be diing leh kouhtuamte kilamtouh tuahna diing ahi zaw hi. Huziahin media te i zahna tungtawn a i heet diing a poimoh chu mipite mamoh leh deihna he in lungsiatna toh khat leh khat na kitohsah diing uh a, huleh media te'n Pahian i biahna ah a hung panpih theihleh a phatuam theipen in i zang diing uhi.



# PAAHNA BUKIM

~ Doukhankhual, MABT

*“Theipi kung paah louin, grepgui ah agah um louin; Olive tohgimna guahsuaahin, huleh louite’n neeh diing piangsah louin; huang apat ganhonte saat khiaaha umin, gan huang ah gante um tasih jongleh: Huchiin jong Lalpa ah ka kipaah diinga, ka hutdamna Pathian ah ka nuam thouthou nalai diing hi. Lalpa Pathian chu ka haatna ahia, ama’n ka keeng chu sajuhpi keeng bang in a bawl diing a, huleh ka mun saangte ah ahung khohei sah diing hi. La lamkaipa toh ka tumging guineite a sah diing, Habakkuk 3:17-19.”*

## Thumapui

Lehkhangialtu minthang philosopher leh prince of paradox chih minvuah hial Gk. Chesterton in hichiin a gen hi “*Khrist tellou kipaahna pen a pawtham (outward) lel hi va, Khrist tellou dahna pen a sunggil (inward) hi, himahleh Khrist tel a dahna pen a pawtham mei leh Khrist tel a kipaahna pen a sunggil hi*” a na chi hi. Khovel siatna nipilai luipi luang bang a luang zungzung kaal ah nopna ninou eng singseng lenkawlah ah hungsuah diing ngaah in duangvul lunghel lungliap in na gaaldot zing nalai maw, simlei paahna leh nuamna zaw jing ni suah leh nitaah a tum zel bang mei in khimziing in hung tuamkhum kitzel hi. Lenpiah gual laiah ah sanggah kisa huibang mau laidip dap in mimva bang na tautau maw. Sesum ning kiching leh kolchiang vang a simlei nunnuam a lengte maw paahna bukim nei a na geel. Nichin sunggil kial’ vaang phamlouhna diing neeh diing hawl a, na sepgim nate vang in maw vangsel leh paahna neilou kisa a na um. Simlei ah zaw khualzin leh i hisap na ngen in buching na umlou hizongleh Thianmang limbang bel te a di’n lungsung paahna leh paahna bukim a hizaw. Paahna bukim neite chu..

## Hutdamna hechiang (Assurance of salvation)

Zawlnei Habakkuk in hun sawt tah a bualna simlei a en a, paahna (kipaahna) diing himhim a musih hi. Aw a gam simthu siatnaten jingvai bang hawm in, saltaan na apat zaan a meikuang,

suun a meipi a puikhiat Israel tate sual in dim jouta, Pathian nungheisan in milem pathiante a biah tava, kithahna leh ngol ngamtatna in a gamsung uh a zelsuah ta a, thaangtatna poisalou hinkhua a manlai un, gamsung ah neeh diing pianglou in kial leh hipi in nasatah a bom in huangsung a ganta te sibeita kinepna theigah Olive kungte gah talou in mailam khuajjingta e, Pathian suah pa a diing in zaw a gam sungah ah kipaahna diing zalmang inzong matphaah a hisih hi. Gamsung siatna te vang in pat puan bang nem jou Habakkuk in Thianmang angsung limbang bel in a hutdamna ah kipaah veve nalai hi. Ka hutdamna Lalpa ah ka kipaah veve diing!!

Na simlei gimthuah na ah khuisa leh ngui in paahna diing mong mong gelphaah louh gam ah na um maw? Simlei nunnuam bual a paahna hawlin na um maw? Sihna leh natna ten paahna hung laahmangsah veu hilou a hia? Simlei paahna in hagu gam hung mualsuah pih lou diing a, hizong simlei paahna khenlam a paahna Thianmang hutdamna sung a nuam te a ding in simlei huihsia in a nawhkha theihlough paahna bukim chu a um hi. Krist hutdamna huangsung a lutte din chu (Romte 8:37-39).

### **Hundampa hechiang (Assurance of savior)**

Aw gam mangbat huai leh khimziing kaalah Thianmang halim nuai a nunnuam Habakkuk in a hundampa a hetchiang vang in, bangteng hung tung in ka gam ah neeh diing umsih jongleh ka hutdamna Lalpa ah ka kipaah veve diing hi a chi. A hundampa in Sajuhpi bang in munsang tah te ah a pui diing (huchu melma leh hung susia theite apat bitna mun chihna ahi) chi in simlei simziing lai ah paahna zai awi in Jehovah Pathian ka hatna chi in a hundampa Thianmang sung ah paahna bukim toh a kihamuan ta hi.

Niteng lungdong in mailam khuanim thengmoh diing gelin na ngui veu maw? Thianmang limbang bel a hechiang te a din zaw hetlough gam i lenlai in zong Jehovah i Pathian in i ma hungpui zing diing chih ginna zal a kalsuan a hizaw hi. Ginna a pa chih a kouh Abraham Ur gam a kipan kouhdoh a hihlai in a chiahna diing a hesih hi, hijongleh a hundampa Lalpa kouhna



chu hechiang in a chiah zaw ahi. Ei uh jong mailam simziing leh khuaniim ten hung thuam zong in tunna diing Jerusalem thah mitsuan in ginna toh chiah jel ni. Hundampa hechian tate a diing in lungngaih na khenlam ah paahna bukim toh kalsuan ahi.

### Thukhaahna

Nuai simlei nunnopna leh heemna i zohchian thangvan tual ah i iit i ngaih teng toh tawplou in Lalpa loupina zaila awita diing Thianmang angung limbang bel a hutdamna hechiangten simlei simziing jongleh hundampa mapui na hechiang in paahna bukim Khrist mitsuan in kalsuan zing ta diing..Theipi kung paahphalou in, grep guite ah a gah umlou in; Olive tohgimna guahsuah in, loute'n neehdiing piangsah lou in; a huang a kipan ganhonte satkhiah a um in, huangsung ah ganta umta sih zongleh; ka hutdamna Pathian ah ka kipaah ve ve diing hi.

Simtute Jehovah Pathian in paahna bukim hung guan ta hen, Amen!



Taangte lamah ka mit ka hahtou diing hi; Khoi apatin ahiai keimah hung kipanpihna a hung tun diing? Kei hung kipanpihna chu LALPA, Lei leh vaan siampa apatin a hung tung hi. Ama'n na keeng akitaal a phal sih diing hi; Nangmah veengtu chu alusu sih diing hi. Ngai in, Israel veengtu chu alusu sih diing a, Ihmu zong a ihmu sih diing hi. LALPA chu nang hung veengtu ahi a, LALPA chu na jiatlam a nang hung liahtu ahi. Suun in ni in a hung haai sih diing a, Jaan in ha in zong a hung salh saam sih diing hi. LALPA'N gilou zousiah apat a hung veeng diing a, Na hinna a hung kepsah diing hi. LALPA'N na pawt leh na luut aveeng diing hi, Tu apat kumtuang tanin.

Phatna Late 121:1-8

# TONGGIM LEH PUAHGIH PAWTE

~ By: Rev. T. Chinkhangan NTBC, Shillong

Nanguh tonggim leh puahgih pote zousiah ka kawmah hung un, keima'n khawldamna ka hung pe diing hi. Ka ngawngkol pua unla, ka kawmah zil un, ajiahchu jaineemtah leh lungtang a kingaingiamtah ka hi a, huchiin na hagau diingun khawldamna na mu diing uhi. **Matt. 11:28-29**

THUMASA:

Amasapen in simtu zousiah CHIBAI!

**K**umtuanga beimang leh mangthaai a ium lai in, I Lalpa Jesu in ngaihkhua hung tuah in, thu chauh a hung lungsiat lou in thutah leh natoh in kros ah ahinna hung pe ta hi. Tuin eite tanchinpha jaal in itawl in igim na viai? Huleh tuni a igim leh ibuaipih te uh insung, pawlpi, leh kouhtuam ading ahih lai in Lalpa ngaih in ahoihna diai? Tanchinpha toh kituah in mite etton theih diing chih i deih pen ahi. Ajiahchu ginna tampi toh vaangam iluut ngei diing uhi.

KA KAWM AH HUNG UN

Ka kawm ah hung un chi a hung kou pa chu heet Chet apoi moh hi. Amah chu bangkim bawlthei leh bangkim hung pethei Lalpa ahi. Ahamphat um ngei mai! Tunin Khrist khap nung I juihna ah tampivei mial lah ah ikipalkha un ipuuh jeel uhi. ILAMPI TE UH I ENCHIAN THAH DIING UHI (Kahlate 3:40). Hujiah in I LAMPI LUUI TE UH KAAAN TAN IN LAMTHAH AH IPAITA DIING UH (Jer. 6:16). Koipouh in lampi a ADANG ATAAH LEH HUNG IN KEI KAWM AH DAWN HEH (John7:37). Tunin ahung koupa kawm na Juan diai? Kingaihtuah ni.

KHAWLDAMNA KA HUNG PE DING

Heb.bung 2 sung ah KHAWLDAMNA chih thumal kua(9) vei tah imu hi. Hu chu mi khattou khat a chingloua aum khaah

diing buaipih ana hi jaw hi. Tuni'n eiten jong ibuaijih diing uh pen tah chu hagao mangthaaite Jesu kengbul a tut leh I mihinpih te Jesu khapnung juui siam dia chiil leh mite etton dia tanchinpha toh kituaha hinkhua mat chu sil dihpen ahih ngeingei diing ahi.

#### KA NGAWNGKOL PUA UN

Jeremiah Kahlate 3:27 ah mihing a diingin KHANGDAWN LAI A NGAWNGKOL PUAH CHU AHOIH HI ana chi a, hichu sil poimoh tah hi diing ahi. Ajiahchu kumpi David in suhgim a ka um chu kei adiing in ahoih hi, Suhgim a ka um ma in ka na vaahvaai jeel ana chi hi.(sam 119:71). Hi NGAWNGKOL PUAH chu jumpih loua thumang tah a poten Khrist thuahna kikoppih in kumtuang hinna atan baan vah leitung damlai in Jong alohsam ngei sih uhi.

#### KA KAWM AH JIL UN


Miten ngaihsang leh hinkhua a etton (mentor) ki nei chiat sam hi. Tuniin koi na mentor ahiai. Khovel mihausa te mo? Politician lohchingte, film industry a bawltheite i Lalpa Jesu principle chu thuahtheihnate, jaaineemnate, kingaihngiamnate leh adangdang te ahi. Aman gaal abawl ngei sih a, agual jou Jing hi. Buh leh baal Akhol khom ngei sih a, hauhsatna teng akawm ah aum, lohchinna leh minthanna ahawl ngei sih, ahi in amin in tawpni anei sih ding a Agam lah a lian seem seem ding hi. Hujiah in i Lalpa keengbul ah bangkim jilni.

#### THUSUHTAWPNA

Lalpan kros ah johna apuang ta hi. Lalpa tellou in kros(ngawnnngkol) puah chu ahahsa in atawl um ta Lua hi. Lalpa toh i puah Chiang in ajangin apuah anuam hi. Tuni'n banglam ah itawl in itong gim a?. Khrist thuahna tawlpih chiatni.

“Lalpan athu vaangpiah ta hen.”





## BIBLE STUDY

~ S. Pauchinlian

### Paul Tanchinpha Pathian Apat (1:11-2:21)

I Hinna Thah uh 2021 February issue ah Galatiate 1:1-10 tan hihlchetna i neihna ah, sawlleh Paul in tanchinpha dang umlou, tanchinpha khat chouh um ahihdan chiangtah in ina zil zouta uhi. Tu ha March in Galatiate 1:11-17 sung i en kiit diing uhi. Galatiate bung 1:11-2:21 sung ah sawlleh Paul in tanchinpha Pathian apat amuh ahihdan hoihtah in a genchiang hi.

*Paul Tanchinpha vv. 11-12; “Hizongleh unaute, ka tanchinpha soi chu mihing deihdaan ahi sih chih ka hung hesah hi. Ajiahchu mihing apat ka muh zong ahi sih a, mi hung hihl zong ka hi sih a, hizongleh Jesu Khrist hung kilaahna jiaha ka muh ahizaw hi.” Paul in v. 10 ah mihing kipaahsah sawm a tanchinpha tangkoupah hilou a hihdan a genzoh in, chaang 11-12 ah a tanchinpha gen koi kawm apat a muh (midang gen a zaah hilou) ahiai chih chiangtah in a hung gen hi. Muh/dong sap haam in ‘received’ chih ahi a, Grik ham in *paralambano* ahi. Grik ham *paralambano* a kizat chiang in chu midang tungtawn apat muh (received) hilouin mimal a tangtah (direct) a amuh ahi chih genna ahi. John MacArthur in hichiin a gen hi, Paul in v. 12 ah a tanchinpha muhdan Judami thuhilh dihoute in Juda daan a heetna uh houtu khat in khat kawma a khang a kihilhsawn a aheetdan uh toh kibanglou ahihdan a gen hi. Hih Judami te in ahihleh a daante uh Pathian thu apat in a zilsih va (a heet uh a hisih a), himahleh a houtute uh Pathian thu lehdan (interpretation) in a zil uhi, huziahin Bible thuhilh toh kikalh zong a um hi (Mk. 7:13).<sup>1</sup> Paul in mihing apat tanchinpha amuh hilouin himahleh kilaahna, ‘Jesu Khrist kilaahna jiaha’ mu (recieved) ahihdan agen hi. Paul in a piangtah ma in Jesu Khrist ana he in ana muta mahleh, mimal tah a tahsa a kimaituah in Damasca lampi ah a kimu pan uhi, hihun in tanchinpha dihtah chu Khrist kawm apat in a mu hi (Silbawlte 9:1-16). Sawlleh dangte ahihloughleh Jesu a damlai a nungzuite kawm a pat tanchinpha a heet ahihloughdan*

1 MacArthur, *New Testament Commentary – Galatians* 1:12

leh Jesu Khrist kilaahna apat a muh ahihdan leh sawlleh hiding a guattu zong Khrist ahihdan Paul in a piangthah thu a soina (testimony) ah a heettheih hi (Silbawlte 22:14-16; 26:15-18 sim in). Tu hun a tanchinpha eite'n i taangkoupah te uh chu sawllehte (apostles) in Pathian lehkhahu ah ana gente uh gensawn ihi uhi. Himahleh sawlleh Paul in tanchinpha chu Jesu Khrist kilaahna apat tangtah a amuh ahihziahin Paul pangna chu a khauh mahmah hi. Thil heetpihtu (witness) mit a mutu leh midang gen a ja sawn, ahilhoughleh hesawn te chu a kibang sih uhi. Paul in sawlleh dangte tungtawn a tanchinpha amuh ahilhoughleh aheet hilou a tanchinpha neitu Pa Pathian leh Jesu Khrist kawm a pat a zaah leh amuh ahihziahin (v.12), a kinangpih Judamite sang in nasatah in muang huaizaw hi.

### **Paul Hinkhua Lui vv. 13-14.**

*“v. 13, Ajiahchu bangtobang a Pathian kouhtuamte tehguallouh a suduhdah a, ka suhbei veh tum daan tuma a Juda sahkhuah a ka umlaiin ka tungtaang na jata uhi.”* Paul in a piangthahma tanchin tomkim leh Khristian sahkhuah ana doudal leh suhbei sawm dan a gen hi. Paul hunlaiin amah chu Juda sahkhuah zuite lahah zong a penpen a kigente ahi. Bangziaha Juda sahkhuah in Khristian sahkhuah kipanchiil hichituh a na hua a, ana dou a dih ve aw chihbang ngaihnan nanei meitheih hi. Hitobang a nungzuite huatna ahilhoughleh Khristian te huatna/douna chu Jesu'n leitung a tanchinpha natoh laiin zong ana genlaw kha ngei hi. Jesu'n nungzuite kawm ah hichi in a chi hi, *“..Amah un kei a hung suhduhdah un chu, nanguh zong a hung suduhdah diing uhi; ka thusoite a juhi uh leh, na thusoite uh zong a zui diing uhi, Johan 15:20.”* Paul ahihleh Judate lah a Pharisaite ahi a, hih Pharisaite in Jesu Khrist a hua mahmah mei uhi, huziahin Judate leh Pharisaite a diing in Khristian te chu a hua (hatred) talaw diing uhi. Ka *tungtaang na jata uhi* a chi hi, Jesu Khrist toh a kimaituah ma a Khristian te diing a mi lauhuai ahihdan, a piangthah nung a gingtute'n Paul ana muhdan un zong a heettheih hi. Paul a piangthah zoh in nungzuite juhi som in a um a himahleh mite'n amah a na lau uhi (Silb. 9:26). Paul in a gen mahbang in Khristian te a suhbei theihna diing a apanlaah

daan Khristian te in aheettah Chiang un, Paul a piangthah diing in zong a gingta theisih uhi (Silb. 8:1-3; 9:1,2). *v.14, Huleh ka **pulepate tawndan** a phatuam ka ngaih diaahkhol jiahin Juda sahkua lamah zong ka chipihite laha ka khanguual tampi ka na khuup hi.* Hi chaang ah Paul in sahkua lam toh kisai heetna leh zuihna lamah amah hunlai a khanguualte a khuup chih i mu hi. **Pulepate tawndan** himun a tawndan chu Grik ham in **paradosis** ahi a, huleh English bible teng in tradition in alet (translate) veh uhi. Huziahin paradosis (tawndan) kigen chu a khang a kam a kithuhilhna ahihloulleh a gelthoh a kithuhilhna ahoihlam bang, ahoihlou lam genna bang a ki thuhilhna genna a hithei hi. Banglam genna a ki zang a hiai chih heetkhen theihna ahihleh a zatna mun (context) a kinga (depend) ahi. Hi Galatiat 1:14 a kizatna jiahchu mihing siamtawm Juda daan te genna ahi, mihing tawndan a hoihlou lam ki genna etsahna diing in Bible chaang khat ka hung sulang diing hi. Mark 7:8, 13, “*Ajiahchu nang un Pathian thupiaah paampaih in, mihing tawndan na tu va, huchu beel leh noute sil bang, huleh a dang tampi huchibang silte na bawl uhi... achi hi. na kipiaah sawn jel uh na tawndaan uh jiahin Pathian thu bangmahlou na suaahsah uhi. Huleh huchibang sil tampi na bawl uhi,*” a chi hi. Tawndan ahoihlam Bible a kizatna ahihleh, 2 Thess. 2:15, “*Hujiahin unaute, ding kip unla, thusoi in hiin ka lehkhathot un hitaleh, thugousiah (tradition) nanguh hung ki hilhte chu tukip un,* (2 Thess. 3:6 zong sim in).” Paul in a piangthahma in hia a tung a mihing bawltawm Juda tawndaan hoihlou i gente, tawndan tuamtuum hoihlah in ana zui hi. Paul in tahsa lam thu ah suan diing hawl diing hileh a chipih te tung a khuup daan Phulippite 3:4-6 sungah Chiangtah in a gen hi.

### **Paul Kouhna vv. 15-17**

“*v. 15, Hizongleh ka nu gil sung a ka umlai apat hung koihtuamtu leh a hehpihna a hung koutu Pathian in.*” Hizongleh chih Bible ah a kizang tam mahmah hi. Hizongleh chih a kizat Chiang in thuma leh thunung chu a kikalh/kibatlouh dan (contrast) a sulang hi. Vv. 13-14 ah Paul in a hinkhua lui a genzoh in, chaang 15 ah Pathian apat kouhna saang ahildan a hung gen hi. Hi kouhna chu Thuhun Lui a Pathian suaah zawlnei

te bang a, a piangma a nu gilsung a aumlai apat koihtuam (set apart) a hihdaan a hung sulang ahi (Jer. 1:5; Ps. 71:6; Is. 44:2; 49:1). Thuhun Lui laia zawlnei te nih Pathian in a piangma va pat a koihtuam (set apart) Amah na tong diinga a sehtuam nih Bible apat i mu hi; "... Lalpa'n suul a kipat in kei a hung kou a, ka nu gilsung a kipat in ama'n ka min a soita hi, Isaiah 49:1," Huleh zawlnei Jeremiah ngeizong a nu gilsunga a um apat ana koihtuam ahita hi (Jer. 1:5). Thuhun Thah ah baptistu Johan zong a piangma apat sehtuam ahi (Luke 1: 13-17). A tunga zawlnei te Pathian apat sehtuam/koihtuam ahimah bang in, Paul in zong amahchu Jesu Khrist suaah, sawlleh hiding a kouh ahihbanah, Pathian tanchinpha taangkoupah diing a sehtuam a um ahihdan Romte 1:1 ahzong amuh theih hi.

*A hehpihna a hung koutu Pathian in, Pathian apat kouhna zousiah chu a hehpihna jiah ahi, Paul bang a nang leh kei Pathian hung kouhna zong a hehpihna jiah, i hoihman leh chitman hiloua Pathian hehpihna liuliau ziah ahi (Rom. 8:30; 2 Tim. 1:9 sim in). Mihing zousiah chu sual ziaha sihna tangta i hiveh va, huleh Pathian lungthahna tuaah diing zong i hi a, a Tapa in Pathian lungthahna apat a hung suaah tasah ahi (1 Thess. 1:10). Pathian hehpihna eiten i tangtaah louh uh ahi, himahleh Pathian hehpihna jiah a i tang ahi. Etsahna diing a vaan gam bang ahi. Sual jiaha Pathian lungthahna maituaah a vaan gam tangtaahlou dite, Pathian hehpihna Khrist Kros a natoh gingtaat jiaha hutdamna tang ihi. Ephesite 2:8 ah Paul in a genchiang mahmah hi, "Ajjahchu hehpihna a ginna jaala hutdam nahi uh, hu zong nang uh a suaah ahi sih a; Pathian silthawnpiahi ahi."*

*v. 16, Jentelte laha a tanchinpha ka soi theih na diing in a Tapa chu keimah ah kilaahsah pha a sah laiin **tahsa leh sisan ka dong sih a**, v. 17, Jerusalem khua ah, kei saang a sawlleh hi masate kawm ah zong ka chiahtou sih a; Arabia gamah ka chiah zaw a, huin Damaska khua ah ka hung kilehkhiitta hi. Paul Jentelte kawmah tanchinpha a taangkoupah diing chu amah uutna a hisih chih a chiang mahmah mei hi. Hichu mahni uutna hilouin Pathian sawlna, ahilhoughleh Pathian kouh ahihna ahi. Tu hun a gingtu zousiah zong Thuhun Lui laia zawlnei te kouh*

ahihmah bang un Paul zong Pathian natohna ah Jentelte kawm a tanchinpha taangkoupah diing a kouh ahi. Hagau silpiaah teng miteng in a ki neiveh sih a, a tuamchiat i nei hi; a khente silpiaah ah Pathian na tong diing bang, evangelist diing bang, ahihloughleh pastor diing bang leh a dang dang a Pathian gam keehlian diing a kouh ihi uhi (1 Kor. 12; Eph. 4). **Tahsa leh sisan ka dong sih a.** Nungzuitu (disciple) in a nungzuihpa ahihloughleh houtu kawm apat in a zilsawn ahi. Etsahna diing in Hebrai 2:3 i en zual diing hi, *“hucihlawma hutdamna loup i ngaihsah sih lei, bangchiin ahiai i suahtaata diing uh? Hu hutdamna thu chu a chiilin Lalpa’n a nasoi pat ahi a, huleh a thu jatute’n i kawm ah a sukip uhi.”* Himunah hutdamna loup i (tanchinpha) kihilhsawn/kipiahsawn daan a muhtheih hi, Lalpa Jesu’n a soi masa a, huzoh in nungzuite in huh hutdamna loup i thu chu midang a zakha nailoute kawmah a gensawn uhi chih i mu uhi. Hichaang (Heb.2:3) hoihtah a i sim leh Hebrai gialtu sawlleh Paul ahihdiing bang a gingtat huaisih hi. Ajiahchu Paul in tanchinpha midang gen apat a jaahsawn ahihloughjiah in. Eite zong Bible apat ahihloughleh tanchinpha thugentute apat in i zilsawn ahi a, himahleh sawlleh Paul in Jesu nungzuite kawm apat in tanchinpha a heetsawn ahisah a, Jesu Khrist kilaahna apat a heetsawn ahizaw hi. Huziahin Paul in tahsa leh sisan ka dong sih a chih ahi (hichu mihing ka dongsih a chihna ahi). *Chaang. 17* i simleh, nungzuite leh gingtu dangte kawm ah tanchinpha ki hilhsah lou ahihdan a hung hilhchiang hi. Bangchiin i hethai ei? Jerusalem ahihloughleh Damascus a Khristiante kawm a chiah sang in Arabia gamah a chiahzaw hi chiin a gen hi.





# CHARLES H. SPURGEON (1834-1892)

~ Kimboi

**T**hugen tuten paahtatna lianpen i piah theih uh ahihleh Spurgeon bang in thu a gen ei? chih ahi diing hi. Tu hun a Spurgeon thugen ngaikha hawl diing hileh a hahsa mahmah diing hi. Ahihvang in a thugen ngaiphotmah in tutan in apaahat mahmah uhi.

Spurgeon ahihleh a thugen a thupi mahmah a, huleh tutan in zong a thugen te a thupi hi. Midang thugen te Leivui in khuhdim lezong Spurgeon thugen chu kisim zing in ki gen zing diing hi. Huleh Spurgeon pen koi ahia chih Thugen khangthah te leh mipi te in i hawldoh kiit uh a ngai hi. Helmut Thielicke in Spurgeon a muh a athugen ahihleh “*Naneih teng uh zuah unla.... Spurgeon lei un*” achih pen pomtheih mahmah khat ahi.

Charles Haddon Spurgeon in mihing hihna ah lang (side) tampi a nei hi. Victorian England hunlai a kouhtuam toh kisai lehkhabu teng ah a min a kimuzou hi. Pathian ministry thu a gen sung a kum/hun zatteng en lei: New Park Street Chapel a thugen di a akikouh lai

in Crimean gal a kipan a, The Great metropolitan Tabernacle a hung kum in The United States Civil war ki chi a kipan hi. A thugen hunlai in lekhagelh minthang Karl Marx in’ The Communist Manifesto’ leh Charles Darwin in ‘Origin of Species’ kichi mihing te kipat dohna dan te a gelh uhi. Charles Spurgeon ahihleh Phillips Brooks, Alexander Whyte, D.L. Moddy, F.B Meyer, Alexander Maclaren, R.W.Dale (a man a thugen uh a pom loute ahi uhi) Joseph Parker kichi te toh a hun uh a na kibang hi. Spurgeon theih diing i chihpen kouhtuam a diing a thugen lah a athupi pen thei ahihdiing hi.

Spurgeon tung tangthu theih beh ut te in W.F. Fullerton in 1920 a agelh C.H.Spurgeon kichi i sim leh Spurgeon hihna a kithei beh thei hi, ajiah

ahihleh amah chu Spurgeon toh kithuah khom a kinaipih in a gelh jiah ahi. Kum 1879 a pat 1893 tan Fullerton in Spurgeon kouhtuam kithuahpih tu leh Spurgeon um louh chiang a thugen a kizang mi khat ahi. Kum bangzah aha khat Fullerton in Spurgeon Sermon te suahkhia diing a ana et tup/bol fel a, huleh khoiteng Spurgeon gelh ahia bang teng Fullerton sukdi ahia chih theihdoh a hahsa mahmah hi.

Fullerton in Spurgeon a deihna leh apaahatna toh a sermon te agelh zel vang in khat vei vei a deihlouna zong a mukhazel hi. Fullerton lehkhagel ahihleh a hoih a huleh theihna zong a kibehlap a mi a su thathou mahmah a simkiit zel zel theih zong ahi. Fullerton in a thu tawpna a agelh chu a thupi mahmah hi. Ama'n agelh na ah 'kei a diing in amah chu ka pu leh kaloipa ahi. Huleh kei hun in amah bang a hihna tampi nei, thu genthei, mi hoih, mi kingaangiam, mi kipezou Pathian mipa khat ahi chih kamu kha a huleh kenzong kisathei tah in chibai kabuh hi a chi hi.

Tu in Spurgeon hihna tangpi i theih zawh tah chiang

in Spurgeon tangthu Banner of Truth kichi in volume nih a kisuah pen i sim thei diing uhi. Spurgeon tangthu ahihleh amah lehkhagel leh a Record te kum1897 a pat kum 1900 tan en a ki bawlkhom ahi hi. Hih volume nih te a kibawl zawh a kipaahhuai mahmah hi. Hih volume nih tegel a thu a poimoh lou tampi a kilaoh hi, etsahna diing in – Spurgeon sermon (outline), Newspaper a thu kiladoh te ahihlounleh a letter thupi loute ahi hi. Huleh hih volume nih te ahoih na ahileh a lehkhagel tu in letter te enthah in a thu a kizom tou na diing a gual thah hi, huleh anuai ah agelh na jiah te zong a hilh hi. Hi volume nih te lehkhabu pen page-1000 val a hihvang in i sim leh theihloun kaal in a lehkhabu a ki sim zou hi. Spurgeon thugen a ki chian bang in a thu gelh zong akichian mahmah a huleh a tung tang a thugel thah te'n zong bangmah koihbeh lou in amah gelh dan mahmah in agelh zel uhi.

Spurgeon ahihleh thugen mi chauh hilou in galdou mi zong ahi. Ama'n hangsan tah in Pathian thu Bible a kimu bang bang in a gen a huleh a thugen mi khenkhat a din zaah nop

huai hisihlezhong a ki suanglah tuan sih hi. Thil neu khat a dih a themkhat a dihsih hi chih kei paidan (principle) ahi hi chiin naupang te kawmah a thuhilh a genzel a huleh mi tampi in hi thudih a pomsih uhi a chi hi. Ama'n ka unaute aw eilawi chu *ginna thudih gen di a Pathian hungsol ihi uhi a chi hi*. Huleh ama'n a naupang te a hilhna ah *leitung a na khuttum suang a mi kihauptih din kisa sih unla'n hizongleh hinna thuhoih thau (gun) bang in tawi unla'n na toka vah puah un a chi hi*. Amah mahmah in a thuhilh a paipih a, huleh a thuhilh in kitheih siam louhna a umсах Chiang in zong amah a nungkiih tuan sih hi. Huleh hi thu ahihleh **Iain Murray** in a gelh ***The Forgotten Spurgeon*** lehkahbu ah a kimu a huleh hi lehkhabu ah Spurgeon galdou te aki gelh hi, etsahna diing in Baptisma tang tung taang, Arimanism thuhilh tung taang huleh Liberalism thuhilh te ahi hi.

Spurgeon in Pathian thu siangthou chu bangmah toh subuahlouh in a hilh hi. Huleh amah bang a Pathian thudihtah gente toh a kithuah khawm hi. Kum1855 in hangsan tah a Pathian thu koi mah demlough a genna a hung

pan a huleh a loite khen khat amah tung ah lungkim louhna a nei uhi, ajiahchu mi tamlou a diing Calvinistic Doctrine a tangkoupih taahlua a huleh tamlou a ding in a Calvinist tahtah zousih hi a chi uhi. Huleh hi kitheih siam louhna in Biakna lam a thugelh tute Spurgeon's piangthah gintaat louhna leh dotna a nei uhi. Spurgeon in a loite kawm ah a genna ah 'kei ka hihleh koimah hung manghilh zual zual thei kahi sih a huleh Pathian bawlsa leitung a thu a dih a ka paipih a koimah ka lau sih hi a chi hi.

Huleh Spurgeon in kitheih siam louhna (controversy) a tuah dangkhat ahihleh Baptisma toh kisai ahi. June 5 kum 1864 a Tabernacle mun ah thugenna a pan hi. Hithu a genna ah Spurgeon in Mark 16:15-16 sung a sim a huleh hih a thugen in a sermon gelh a juah tute a beisah diing hi chih a gingta a, himahleh thiltung chu amah ngaihtuah banglou in um in, a sermon chu million Quarter bang a ki zuahdoh zou hi. Fullerton in agenna a, Spurgeon sermon lehkha page a kitaahdoh kouhtuam teng ah a kimu zou a, huleh Spurgeon in hi thu a theih tah in nuam a sa mahmah

hi. A loite khat in a chiammuh (jokes) a, *nang tuisa lah a um ahi chih kazaah a achihleh, Spurgeon in 'um sing ei, kaloi dang te ahizaw uh tuisa lah a um chu, kei ka hihleh meikuang a pang tui sou sah pa ka hizaw achi hi.*

Spurgeon tup leh ngiim ahihleh Baptisma Doctrine thu chough a hisih a, ama'n a buaipih pen Roman Catholic te thuhilh England ah a khang leh apung hulhul jaw ahi, huleh Roman Catholic te thuhilh a deihlouna gumtah in a genzaw hi. Huleh Bible thudih te tangkoupah a gen diing chu amah gaalsat thupipen ahi a, Pathian hehpihna a genna ah gaal bangzat saat diing hilehzong kisa sa in a umzing hi.

Spurgeon's nialkahn (controversy) a tuahlah ah hih a thumna a atuah pen amah a diing in ana mahmah hi, ajiah ahihleh hih a controversy thumna in Baptist Union a aloite a sukha mahmah hi. Spurgeon in kum1887 in Sword and Trowel kichi magazine ah Baptist kouhtuam lah a thuhilh dihlou apung hi chih ana suah hi. Hih a lehkhagel masa tegel pen 'The Down Grade' a kichi a, huleh hipen 'Down Grade controversy chiin a kithang ta

hi. Spurgeon in ei lah a dotna liantah mai khat ahihleh mi siangthoute tahsanna thuhilh chu bang tan in i sang viai! huleh thuhilh dihlou te bang tan in i sang viai! chiin a dong hi. Khristian itna chu bangtan in i pom va, huleh kituahlouna pen thilhoihlou hi chiin bang tan in i pai va, hulouin thudih lam a pat a kiheimang te bang tan vei i etkai diuh ahia chiin a dong hi. Kum 1887 October 28 ni in Spurgeon chu Baptist Unoin a pat in a potkhia hi. "*Thei na sa sa a, adihlou toh kipawlkhom chu sualna ahi*" chiin Sword and Trowel magazine ah November issue ah ana suah doh hi. Hikuh in Baptist Union te a demna a phuangdoh a huleh Baptist Union ten ahilh chet diuh apoimoh ta hi. Murray's lehkhabu ah Baptist Union te thilbawl a hilhchet dan te uh a kigelh a huleh hipen mi tamlou ten dihlou tah a ngohna a hung hita hi achi uhi. Fullerton deihdan ahihleh Spurgeon amah mahmah a Baptist Union te Assembly a vatelleh chih a deihsah a himahleh hih a deihdan chu a taangtung zousih hi, ajiahchu Spurgeon in Baptist Union a nuutsiat ta jiah in.

Alexander Maclaren ahiehleh Spurgeon kimuhpih diing pastor lite (4) lah a khat ahi a, ahievhang in ama'n Spurgeon tungtaang thu ah a kituamkoih doh hi. Bangziah ahiai chih a kithei zousih hi. Huleh Spurgeon sih (Death) joh in Baptist Union te'n a Headquater luutna vah Spurgeon Statue a koih uhi.

Hia kibuaina thu te tuamkoih in Spurgeon hinkhua leh a Ministry enlei uthuai i sa hi. Spurgeon in nahzial a tep (smoking) zel chih mite'n a thei uhi, huleh nahzial chu British thuhilh tute tampi in zong a tepzel uhi. Khatvei ahiehleh Spurgeon chu a nahzial tep ziah in Methodist thuhilh khat in a taihilh kha hi. Huleh Spurgeon in a dawngna ah 'ka nahzial tep a huaisia talua ka chih Chiang in tawp diing in ka kichiam hi a chi hi.' Huleh mikhat in nahzial huaisia bangchiin nathei diai chi a adotleh, Spurgeon in Khatvei thu a nahzial nihnih tep te a chi hi.

Bramwell Booth's Salvation Army phutdoh pa tapa lehkhabu Echoes and Memories ah, Bramwell in zong Spurgeon nahzial tep dan a gelhkha hi. Salvation meeting

na khat ah a thugena a ding in Spurgeon chu 'fine carriage' a pat nahzial tep kom in a hung kumsuh hi. Amah thugen tangpi ahiehleh ken Pathian thupina diing a nahzial katep zel hi a chih pen leitung a diing thildihlou tampi a bawldoh a, huleh Khangthah tampite kam a thudihlou leh Pathian lam toh kisai thu hoihlou tampi zong a pung sah hi. Spurgeon in nahzial tep a sia a amuhloh vang in theatre te ah ajadah hi. Huleh hih a jaahdah nalam ah 'open-letter' Joseph Parker City Temple London a Pastorpa toh kitheihshiam louhna anei uhi. Parker te kikhop khom napen Spurgeon toh teh a anih na ahi a, ahievhang in amahuh kiloikhom na chu lian in mi tuamtuam tampi a kiloikhom uhi. Parker in poultry Kouhtuam a thu agen lai in Spurgeon in thu kum15 bang a gen zouta a, huleh abul in amahuh tegel a kituah uhi. Mun tuamtuam a thugenna ah kisutuah zel in Khristian te kikhopna mun tuamtuam ah thu agen zel uhi.

Kum1887 February 23 ni in Parker in Spurgeon chu kouhtuam Denomination tuamtuam te kisuhkhom na khat ah 'Evangelical Ginna Lui'

chih thugenna diing a asim hi. Ahihvang in Spurgeon in a jingni mahmah in letter in a utlough dan te agelh hi. Huleh ama'n a genna ah Parker te Ministry in zong ginna thu a tudet zousih hi a chi hi. Huleh Parker in achihleh bang di a nidang a hung hilhpahlou na hia a chihleh Spurgeon in 'Nang le Mr Beecher Evangelical ginna chu kei ginna tahsan khuh ahisih a, huleh kouhtuam thuhilh toh kisai a nang Theatre ah na vahoh zel pen jiah in zong ken nang hungzui theisiing a chi hi. Parker's in a dawnna ah Postcard khat ah: 'Best Thanks and Best Regards - J.P' chiin a thot hi. Huleh hitoh kisai chu April 25 kum 1890 in Parker in Spurgeon alekhathon British weekly ah W. Robertson Nicoll etkawlna nuaiah ahung suahkhia hi. Hih hun laitah in Spurgeon Pastor's College Conference ah a um a, huleh Parker lehkhassuah in buaina tampi a umсах hi. Nicoll amah tah zong Spurgeon deihtu leh gumtu ahi a, huleh bang diing a hi lehkhathon suahdoh ahiai chih amah zong a lungbuai mahmah hi. Ama'n Spurgeon lehkhathon ah hichiin agelh hi 'Nang lamkaih na nuaiah na kipawlkhomna uh keehlian

un, nang chu na jiat na vei a thugen tampi na haatlouhna gen, na chiamnuihna a nui, nang hung thu hilh jingte toh na um khom zing hi, huleh hih a kigen teng lasiam thei diing in mipiching khat nahi a, huhih siang hai (breath) kawm in na Ministry sulian zaw sem in, na ki pawlkhomna uh bawlsia in ka chi sih a himahleh sulian deuhdeuh in ka chi zaw hi achi hi.

Spurgeon in Nicoll lehkhathot a kitheihmoh bawl a, huleh a seppih a loi Pastor te zong kitheihmoh bawl diing agen hi. Huleh hikhuh apat in Parker in Spurgeon haatna pen kituahlouhna hilouin kipunkhomna aum hi chih athei hi. Spurgeon in a thugenna khat ah kiloi khawmna khangtough na di a thudih a poimoh hi a chi hi. Huleh kiloi khawmna ah khat leh khat bawlkhial kisialphou zing in bangmah tan hung tun lou diing ahi a chi hi. Huleh mi tampi Parker, Campbell Morgan le D.L.Moddy bang a ginna jousiah pom leh denomination khen lou mi a um a, huleh Spurgeon, Maclaren leh Truett te bang a Evangelical ginna Ministry te ngaipoimoh mahmah mi zong

a um zel uhi. Huleh amahuh te bang a thugen i neih uh a poimoh a, i dem diing uh ahi sih hi.

Spurgeon tung tang ah thu tampi a dihte, adihloute, a hoih te, chiamnuih nate zong a um hi. Huleh amah theihbeh ut te'n a thugen te ngai in amah lehkhagelth te sim lei, Pathian mi zat ahihna te i thei beh deuhdeuh diing uhi. Eite mahbang in Spurgeon

in zong dihlohna, hatlough na anei a, ahihvang in ama'n Pathian hehpihna leh a Tapa thu a taangkoupah hi. Eilawi chu Spurgeon i hi theisih diing va ahihvang in amahbang in Jesu Khrist thuhilhna lam ah chitahtah in i pang thei uhi.

*(Spurgeon tanchin ahihleh "50 Peoples Every Christian Should Know," Warren Wiersebe lehkhabu gelh apat ki letdoh ahi).*



# NTBC, KHUANGNUNG CAMP REPORT

Lalpa umpihna leh puinate jiahin Lohching tahin naupang/khanglai Camp chu January 21-24, 2021 sung zat ahi a, hutah ah Speaker, P. Hau Shoute, leh Evan. Lunminthang in tanchinpha soina tungtawn in kipaahna/pianthahna bang hung um thei in kipaah huai peet mah hi. Lalpan loupina tangta hen.

Hi camp diing toh kisaia, Hamteina a hung na panpihtute, leh sum leh silpia a hung panpihtute, tung ah zong kipaahna thu ka hung soi ahi.

Panpih na hung pe te:-

- |                                   |                        |
|-----------------------------------|------------------------|
| NTBCA, Numei Pawlpi te apat in    | Rs.3000/               |
| Khanglai pawlpi apatin.           | Rs.3000/               |
| Mr. Lianmalsawm (Vinsend)         | Rs. 500/               |
| Rev. T. Danial Simte              | Sang (bread) pocket 10 |
| Tualsung local ate gen lough ahi. |                        |
| Hi camp a hung telte chu.         | Pasal ----- 23         |

Numei ----20.

Total ----- 43

Neeh leh dawn hung bawl sah, Nu pawl khuangnung Ntbc, Upate tung ah leh, hitoh kisaia pan hung laah pihtute jousiah tung ah kipaah thu Ka hung gen uhi,

Lalpan loupina tangta hen aw.

## HOPE BAPTIST CHILDREN HOME@HBCH, BIBLE HILL RENGKAI AUMTE'N DECEMBER HA SUNG A SILPIAH A MUHDAAN UH

<b>Sl. No.</b>	<b>Names</b>	<b>Address</b>	<b>Items</b>
01.	NTBC, Tuibuang	Tuibuang	Rice 50 Kgs.
02.	Donhoihkim, Simveng	Simveng	Second hand Puanaah toka.
03.	Th. Paukhuip	Zoutung	Mehdi bag khat (Malta Squash dolhou, Leh Lengmasel
04.	NTBC, Sumtuh	Sumtuh	Maisan pum 21, Malta dawng hunkhop leh Maipuang pum 20.
05.	Florence Nenem	Beulahlane	Second hand Half bag le hakim
06.	Jadora Online Shoping	Imphal	Second hand half bag khat.
07.	NTBC Numei Pawl	Tanguam	Rice 41 Kgs.
08.	Emmanuel Pharmacy	Simveng	Gilpi hatna buuh 11 leh Vitamin buuh 19
09.	Ureka Café	Hilltown	Dinner treat.
10.	Pa P. Vumminthang leh Nu P. Niangneiching tapa nihna P. Chinlianthang	New Lamka	Rice 50 Kgs. Leh Turkey tal nih.
11.	Chingnu	GCK Veng	Rice 50 Kgs leh daal 3 Kgs.
12.	Mrs. Chingboi	Guwahati	Sweet 1 Pkt, Munch Chocolate 2 boxes, Parle Cake 48 Pieces, Swiss role 1.





# NSS TEACHERS' ORIENTATION – 2021 NEIHZOH HITA

A 2veina Naupang Pawlpi kumtawp vaihawmna (2020, November 29) a Naupang Pawlpi thu passed ah Naupang Sunday school teachers' orientation neih hihen chih bawhzui na in, a paita January 30, 2021 (Kiginni) in NSS teachers' orientation neihzoh ahita hi. Hihun ah resource person in NTBCA sung apat mi 11 in class teng ah hilhtu in pang uhi. Resource personte leh class a laahte uh ahihleh:- Rev. K. Hangnung ABBC&S President in Youth – II Class, Rev. T. Danial Simte, Director of Mission NTBCA in Youth – I Class, Pastor H. Kaiminlian in Senior Class; Rev. Th. Paukhochinzam in Intermediate -II Class, S. Pauchinlian ABBC&S Registrar in Intermediate – I Class, Vungneiniang teacher in Junior Class, Th. Thangkhochinpau Pastor in Primary – II Class, Luckson Ginvanglian Simte in Primary – I Class, Ngulzaching Lecturer in Beginner – II Class, Chingngaihlian Principal HBA in Beginner – I Class, leh Niangneihoih Teacher in Special Class. Orientation neih hun in NTBCA kouhtuam tuamtuum apat naupang Sunday school teacher tamtah paikhawm in, resource person a hung pangсах te toh simkhawm in mi 95 tel thei uhi. Program lohching tah a neihzoh ahihnung in Orientation a telteng in nitaahlam ankuang uumkhawmna um hi. Huleh anneeh diing a poimoh bang hung buaipih NTBCA Bible Hill kouhtuam leh Asian Baptist Bible College & Seminary Student te kawmah Hinna Thah tungtawn in kipaahthu ka hung gen uhi.

## KIPAAH THUSOINA

Asian Baptist Bible College & Seminary in hun sawttah apat ka poimoh uh Guitar lei sawm in ka um va, himahleh sum lam dinmun hahsatna a kineihziah in leitheilou in ka um uhi. Hitohbang sum lama hahsatna a kineih kawmkawm in Rev. P. Khamthianmang DI&SD, NTBCA in unau NTBC Guwahati kouhtuam kawmah ABBC&S poimoh Guitar leisah diing kam a ahung gen, hung ngaihkhiahsah a Guitar kilawmtah na hung leisah na vah ka kipaah mahmah va, hih Hinna Thah tungtawn

in ka kipaahthu uh ka hung gen uhi. Lalpa'n NTBC Guwahati hung phungvuh henla, tanchinpha natoh na leh panpih ngaite panpihtu muanhuai hi diing in Pathian in hung malsawm hen aw. Lalpa min a na silpiahte uh kipaahman na mukiit ngei diing uhi (Mathai 10:40-42).



## BIBLE COLLEGE KITHUAHPIH DIINGA CHIALNA

Asian Baptist Bible College & Seminary, Bible Hill Rengkai, Churachandpur – 795128, Manipur. Jesu'n khovel munchin, gamchin ah chiah unla silsiamteng kawmah tanchinpha taangkoupah un chi a thupiahlian a hungpiaah mahbang in (Mathai 28:19), Asian Baptist Bible College & Seminary, akipat chiil apat in Pathian apat kouhna mute:- Pastor, Missionary, Evangelist leh Bible Hilhtu diing a kouhna saang tute training a kipezing hi. Pathian zalin Bible College apat graduated te Myanmar, Nepal leh India gamsung mun tuamtuan ah church leaders, Pastor, missionary, evangelist leh Bible College ah hilhtu bang in a pang uhi. Hitobang a i ministry uh a gahsuah hoihtah i muhchiang in a kisahtheihpihuaia, huleh Lalpa kawmah loupina zousiah i piaah ahi. Tuniin Pu/Pi/Pa/Nu/Sanggam, nang zong midangte bang in Pathian kouhna na tanglou ahimeithe i hi. Himahleh Pathian kouhna saangtute/mutute chawmtu leh sawmdoltu diing a hung kou zong ahithe i hi. Pathian in malsawmna ahungpiaah tungtawn a tanchinpha natohna diing in silpiaah a Pathian lalgam keehlian na uutleh Bible College tungtawn in bangchihlaipouh in ahithe i zing diing hi.

In extending the kingdom of God through Asian Baptist Bible College & Seminary, in dependence upon God, I promised to support them financially started in 2021.

Name \_\_\_\_\_

Address: \_\_\_\_\_

Mobile no. \_\_\_\_\_ EMAIL \_\_\_\_\_

With the Lord's help I will pay an amount of:

Rs \_\_\_\_\_ Weekly

Rs \_\_\_\_\_ Monthly

Rs \_\_\_\_\_ Yearly

For Online Payment

Acc. Name: Asian Baptist Bible  
College & Seminary

Acc.no: 83440100001012

Ifsc code: BARBOVJCHCH

Payment methods Cash/Online

*Or you can become life patron or annual member of Asian Baptist Bible College & Seminary by giving the following amount:*

1. Life Membership ---- Rs. 10,000 or more
2. Annual member ----- Rs. 2,000 or more (group 5,000 above)

**For more details please contact:**

Rev. P. Khamthianmang DI&SD Mob. +916009489358

S. Pauchinlian Registrar Mob. +919597515230

Or email at: asianbaptistbiblecollege@gmail.com

Na silpiahte tungtawn a College hoihtaha apaisom theihna diing leh, Paul in Timothy kawma agen mahbang a Pathian thu midang hilhsawn thei diingte siamkhiatna hoihtah ahilhtheihna diing in na kithuahpihna Lalpa min in ka hung ngeen hi. Lalpa a diinga na sepgimna na mukiit ngeei diing hi (1 Kor. 15:58).

*"Huleh heetpihtu tampi laha ka kawma thu na jaahte, hute chu mi muanhuai midangte zong hilhsawn thei diingte kawmah keemsah in, 2 Timothy 2:2."*



To.

**BOOK POST**  
**(PRINTED MATTER)**  
POSTAL REGD. NO. MNP-60

.....  
.....  
.....  
.....

PIN

*If undelivered return to:*  
**New Testament Baptist Churches Association**  
Regd no. 1192 Of 1973 Under Society Act XXI of 1860  
Post Box - 45 Bible Hill, Rengkai  
Churachandpur - 795128, Manipur, India.